

Date – 08/03/2025

Time - 18:30 -18:40Hrs

## REGIONAL NEWS BULLETIN

### HEADLINES (EVENING)

1. **Khawvel huap Hmeichhiate Ni - International Women's Day vawiin khan hman a ni.**
2. **Ramchhung hmundang ruala National Lok Adalat vawiina Mizorama neih ah thubuai 1991 ngaihtuah a ni a, heng zinga thubuai 275 chu chinfel a ni.**
3. **President Droupadi Murmu-i chuan ramin khawvel ram Hausa pathumna ni tura a beih meknaah hnathawktu zingah hmeichhia an tel tam a ngai tih a sawi.**
4. **Prime Minister Narendra Modia chuan hmeichhiate dawmkang turin sawrkarin theihtawp a chhuah thu a sawi.**

<><><>

### IWD

**Khawvel huap Hmeichhiate Ni (International Women's Day) pualin vawiin khan hmeichhiate tana kawng sial pawimawhna inzirtirna hun hman a ni.**

**Mizoramah pawh he ni hi ngaihpawimawh a ni a, Minister Pi Lalrinpuii chuan Zoram mipuite Hmeichhiate Ni chibai a buk a, Hmasawna tuantling nei tur chuan hmeichhiate dinhmun chawikan a pawimawh takzet tih a sawi a ni.**

**MLA Pi Baryl Vanneihsang chuan he ni puala thuchah Akashvani kaltlanga sawiin, hmeichhia ten nih theih loh an nei lova, duhna tak tak an neih chuan an thei a, inlungualna leh induhsakna a pawimawh hle a ni a ti.**

**MHIP President Pi Ngurmawii Sailo pawhin Mizoram mipuite chu Hmeichhiate Ni chibai a buk a ni.**

**India Women Hockey Player Lalremsiami Hmar chuan Hmeichhiate Ni pualin Mizo mipuite chibai a buk baw.**

**Siaha ah chuan MADC Golden Jubilee Hall, Council Vaih-ah Evangelical Church of Maraland (ECM) hnuaiia Krizyhpa Nô Py (KNP) Headquarter leh District Hub for Empowerment of Women, (DHEW) Women and Child Development buatsaihin International Women's Day hman a ni a, HIV/AIDS Awareness Campaign neih nghal a ni. He hun hmannaah hian ECM KNP**

Headquarters leh Siaha khawpui chhunga KNP Branch hrang hrang aiawh mi 200 vel an tel.

<><><>

#### **IWD AKASHVANI**

Hmeichhiate Ni pual hian vawiin khan Akashvani Aizawl chuan an hmunpui Tuikhuahtlangah hun an hmang a.

Multipurpose Hall-a hun hmanaah hian, Akashvani Mizoram Director leh Cluster Head ni bawk Pu DR Lalropuia chuan, khawvel puma hmeichhia te ni pualin kal khawmte chu chibai a buk a. Hmeichhe thil tih theihna chu khawvel thil tih theihna a ni tih hre reengin, chumi kawnga hmalakna chak taka kalpui chu an thupui a ni tih a sawi.

International Women's Day pual hian Mizoram hmun hrang hrangah hun hman a ni.

<><><>

#### **BJP WOMENS DAY**

BJP Mizoram Mahila Morcha chuan Aizawla BJP State Office, Mipui Rûn ah, Khawvel puma hmeichhiate ni, International Women's Day puala hun buatsaih a ni a, he hun hi Pi C. Lalbiakkimi, State Mahila Morcha President chuan a kaihruaia,

BJP State President Pu Vanlalhmuaka chuan tuna PM Scheme tam tak chu hmeichhiate ngaih pawimawh avangin, hmeichhe hminga dil a ngai a, Free Gas Connection ringawt ah pawh Mizoram ah hmeichhe hmingin mi 36,000 hnênah pek an ni tawh a ni, a ti.

<><><>

#### **NATIONAL LOK ADALAT**

Ramchhung hmundang ruala National Lok Adalat vawiina Mizorama neih ah thubuai 1991 ngaihtuah a ni a, heng zinga thubuai 275 chu chinfel a ni.

National Lok Adalat hi vawiin khan ramchhunga state hrang hrangah neih a ni a, Mizoram-ah pawh Mizoram State Legal Services Authority kaihruaiin District tinah Lok Adalat neih a ni.

Lok Adalat-ah hian thubuai chi hrang hrang- pawisa inpuk chungchang te, chhungkaw harsatna te, loan rulh that loh chungchang te, telephone bill chungchang te, hnathawh hlawh chungchang te bakah thubuai dangte ngaihtuahho a ni a.

Thubuai ngaihtuah zat hi 1991 niin chung zinga thubuai 275 chu chinfel a ni a, thubuai chinfel hlut zawng hi cheng vbc 5 leh nuai 50 vel a ni.

<><><>

#### **SPORTS MINISTER**

Ni hnih awh India rama Sports Minister te inkhawmpui, 'Chintan Shivir of Ministers of Youth Affairs and Sports of States/UTs' chu Hyderabad-ah neih a ni a, Mizoram Sports & Youth Services Minister Pu Lalnginglova Hmar pawh a tel a ni.

Ministry of Youth Affairs and Sports (YAS) buatsaih Sports Minister Conference hi Union Youth Affairs & Sports Minister Dr. Mansukh Mandaviya leh Minister of State Pi Raksha Nikhil Khadse te'n an kaihruai a. He hunah hian Sports Minister Pu Lalnginglova chuan Mizoramah mihring

nuai 11 chauh an awm chungin Indian National Football team hnuhnung berah Mizo player pali an tel thei a. Sports hmasawna'n media nena thawhona tha neih a pawimawh tawlh tawlh dawn a ni, a ti. Mizoram model chu state dang tan pawh entawn tlaka tha a nih thu a sawi a. Central sawrkarin "One Corporate sector - One sport discipline" kalpui a tum chu lawmawm a tih thu a sawi a, Mizoram ang state tê leh industry lian awm lohna te pawhin an hlawkpui leh zual turin 'One Corporate sector - One state' anga her rem a rawt bawka a ni.

Conference ah hian India rama state 28 leh Union Territory 8 atangin Minister leh official thahnem tak an tel a. Anni bakah Ministry of Youth Affairs and Sports, Sports Authority of India leh National Sports Federation hruaitute leh sports expert thahnem tak an tel bawka.

<><><>

## POWER MINISTER

Power & Electricity Minister Pu F Rodinglianaw vawiin khan hmun hniha kawlpetha tihchangtlunna - Sihmui atanga Zuangtui Sub-Station 132 kV Single Circuit Line leh 11kV Chite Sub-Station bun thar te a hawng.

Pu F Rodingliana chuan Mizoramin kawlpetha a intodelh nan kawlpetha lak leh semna kawnga line tihchangtlunna tur leh kawlpetha mumal zawka mipuiin an hmuh thei nan department in nasa taka hma a la mek a ni a ti a. Sawrkar in kawlpetha intodelhna chu a ngaihpawimawh avangin Tuivai, Chhimtuipui, Turini leh Tlawng khuahna tur chu tharthawh leh a nih thusawiin, nizung atanga kawlpetha siamchhuah kawngah pawh hmalak mek a nih thu a sawi.

Luangmual Sub-Station kaltlanga 132kV line Sihmui leh Zuangtui thlunzawmna hawna hi 132kV Sub-Station, Zuangtui Control Room-ah neih a ni a. Hemi hnu hian Chite Sub-Station hawna chu Chite Sub-Station hmunah neih a ni.

Chite Sub-Station hi Ministry of DoNER hnuiaia North Eastern Special Infrastructure Development Scheme (NESIDS) atangin thawh a ni.

<><><>

## AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

## PRESIDENT

President Droupadi Murmu-i chuan rammin khawvel ram hausa pathumna ni tura a beih meknaah hnathawktu zingah hmeichhia an tel tam a ngai tih a sawi. International Women's Day puala Nari Shakti Se Viksit Bharat tih thupui hmanga New Delhi-a Conference-ah he thu hi sawiim Pi Murmu-i chuan ramchhunga hmeichhiaten ram changkanga India siamna turah dinhmun pawimawh tak an luah tih a sawi a ni. President Murmu-i chuan

**hmeichhiaten politics, eizawna leh khawtlang nunah dinhmun sang an luah ve theih nan sawrkar laipuiin theihtawp a chhuah thu a sawi a ni.**

**President Draupadi Murmu-i chuan vawiin International Women's Day pualin mipuite chibai a buk. Pi Murmu-i chuan International Womens's Day chu hmeichhiate thawhrah ropui tak tak pholan ni leh ram leh khawtlang tana an thiltih chawimawina ni a nih thu a sawi a. Hmeichhiate chu chhungkua,khawtlang leh ram inngahna bulthut an nih thu sawiin kawng hrang hrangah harsatna tawk mahse an theihnate ropui takin an lantir tawh tih a a sawi a. Hetihruah hian hmeichhiate dinhmun dawmkang turin tihtur tam tak a la awm thu President chuan a sawi a. Hmeichhiate him leh thlamuang taka an khawsak ve na tur khawtlang nun siam turin President chuan mi zawng zawng a sawm bawk a ni.**

<><><>

#### **PM ON WOMENS DAY**

**Prime Minister Narendra Modia chuan hmeichhiate dawmkang turin sawrkarin theihtawp a chhuah thu a sawi. Vawiina International Women's Day pual Gujarat-a Navsari-a Lakhpati Didi Sammelan-ah he thu hi sawiin Pu Modia chuan hmeichhiate khawsak ti changkang tura hmalakna hrang hrang a tarlang a. India chuan hmeichhiate hmahruaina hnuaiah hmasawna kawng a zawh mek tih sawiin Pu Modia chuan sawrkarin hmeichhiate dikna chanvo humhalh tur leh an dinhmun chawikang turin kawng hrang hrangin hmalak anih thu a sawi a ni.**

**Prime Minister Modia chuan hmeichhiate himna tur sawrkarin a ngai pawimawh hle tih sawiin tuna misual hremna dan thar pawh hi hmeichhiate chanvo humsaktu tur anih thu a sawi a ni.**

<><><>